

L Comun General à sostituì i organs dl Comprenjore

Do da l'emanazion dl decret per la sostituzion di organs dles does istituzions é l president dla provincia Lorenzo Dellai ruvé te Fascia per enconté i aministradours nufes y rejoné di varesc dl davegni

Politica - L president dla Provincia de Trent Lorenzo Dellai à emané l decret n. 117 di 28 de messel 2010, che despon la decadenza di organs dl Comprenjore ladin y sia sostituzion con chi dl Comun General de Fascia, aldò dl articul 42 dla lege provinciala n. 16/2006 sun les normes en materia de govern dla autonomia dl Trentin.

Al se trata de n at formal prevedù da la lege 16/2006 che met a jì, tl respet di prinzijs de sussidiarité, adatament y desferenziazion, l trasferiment dles funziions aministratives, eserzitedes ades da la Provincia e dai Comprenjores, ai Comuns strutturés sciche associazion.

L passaje pol vegnì autorizé ajache al se à verifiché dutes les condizions nezesciars: via per de mei él sté les litazions dla

Procuradoura y di 9 membri, che fej pert dl Consei general adum con chi nominés dai Comuns. La Procuradoura à comuniché la nomina di organs dl Comun General, perchel à l president Dellai podù emané l decret de trasferiment. Empò ti végnel endana passé a la istituzion nueva demé les funziions che l Comprenjore ova bele: dert al studie, edilizia abitativa, les funziions sozio-assistenziales y cheles istituzionales ordinars. Per l trasferiment dles competenzes definitiv se ruvarà a la fin dl an.

En mercuri passé é l president dla Provincia Lorenzo Dellai vegnù te Fascia per enconté tla senta dl Comun General i aministradours dla istituzion nueva. La enconteda, voluda dal conseier provincial Luigi Chiocchetti, a chela che à tout pert ence l assessour Mauro Gilmozzi,

la Procuradoura Cristina Donei, l President dl Consei general Cesare Bernard y i ombolc de Fascia, é vegnuda clamada ite per descòre adum di adimplimenc da mete a jì tl davegni.

L president Dellai à rejoné de sia idea de comunité locala, ledia sen de organisé i servisc aldò di debujegns y nia plu lieda a les diretives dla Provincia y al à auzé fora ciamò na outa l conzet de identitè y de sens de partegnuda sciche fondament dla costituzion de chestes comunités nueves.

Ades mess l Consei general adoté i ac fundamentai dl Comun General de Fascia, sun chi che la Procuradoura à damané valch sclariment: i criteres y l endrez general per la definizion dles politiches de bilanz; l bilanz plurianual y anual; n program de

verifica dl debujegn dl personal; la dotazion organica; l regolament de funzionament dl Consei general.

Tl davegni darà n auter provediment les indicazioni per

l'adozion de d'autri ac fundamentai da man dl Consei general, en particular chi de natura programatoria en cont dles funziions che é do che vegn trasferides.



La enconteda anter i reprejentanc dla Provincia y i aministradours dl Comun General de Fascia.